

BOLEHKAH PERPADUAN UMNO - M.C.A KEKAL?

Kalau meletus gunung Bayak * Kota Medan menjadi abu
Angin berembus layaran pun koyak * Pelabuhan mana yang nak dituju

Pantun ibarat ini boleh dipakai untuk menggambarkan keadaan perpaduan UMNO – M.C.A. sekarang. Sesak dan suntuk fikiran para pemimpin kedua badan politik Malaya yang besar itu. Itulah sebabnya tarikh Kongres Kebangsaan yang telah ditetapkan pada 18 dan 19 Julai ini telah diundurkan kepada 31.7.53

- oleh M. Ūghāfā –

Lahirnya, yang mengacu perpaduan ini, khasnya berhubung dengan kongres kebangsaan itu, ialah Parti Buruh Semalaya (*Pan Malayan Labour Party*). Tetapi dari punca-punca yang rapat dengan pucuk pimpinan UMNO – M.C.A. ada banyak sebab-sebab yang lain yang menyebabkan pemerhati-pemerhati politik menelah bahawa perikatan UMNO – M.C.A. itu akan putus dan pecah.

Sebab yang pertama ialah berkenaan dengan pembahagian wakil-wakil UMNO – M.C.A. menetapkan bahawa mereka akan membawa wakil-wakil yang sama banyak untuk persidangan kongres itu – UMNO 14 orang dan M.C.A. 14 orang. Perkiraan ini mengikut banyaknya ahli-ahli yang berdaftar bagi kedua badan yang dikatakan besar dan kuat sekali dalam Malaya iaitu dikira 10,000 orang satu wakil. Jadinya, UMNO dan M.C.A. adalah dua parti yang sama kuat. Masing-masing mempunyai 140,000 ahli.

Kepada *Pan Malayan Labour Party* hanya dibenarkan mengirim dua wakil tetapi parti buruh itu mengatakan bahawa ahli-ahli mereka yang berdaftar dan aktif ada sebanyak 400,000 orang. Oleh kerana itu mereka berhak mengutus sekurang-kurangnya 40 orang wakil. UMNO – M.C.A. kaku dan kelu mendengarkan kenyataan dan tuntutan ini. Mereka takut kalah suara. Kalau sekali pun UMNO

– M.C.A. itu bulat dan kuat perpaduannya, maka jumlah suara mereka hanyalah 28 sahaja. Khabarnya yang paling gentar sekali mengadap kekuatan buruh ini ialah Sir Cheng Lock Tan.

UMNO – M.C.A. berharap kekuatan suara buruh itu akan dapat dilemahkan dengan suara-suara dari “Kumpulan Kecil” (*Minority Groups*) iaitu seperti Malayan Indian Congress, Persatuan Serani, KEMAS dan lain-lain lagi.

Sebab yang kedua datangnya dari Perak. Usaha telah mula dijalankan di sana supaya parti-parti politik yang berdasarkan perkauman jangan dibenarkan mengambil bahagian dalam pilihan raya sama ada pilihan raya negeri (*State Elections*) atau pilihan raya *Federation* nanti.

Banyak cerdik pandai dalam Malaya mulai nampak akan perlunya diadakan undang-undang untuk menegah gerakan politik yang berdasarkan perkauman. Keadaan di negeri ini menuntut supaya perkauman dihapuskan.

Sebab yang ketiga datangnya daripada ahli-ahli UMNO yang tinggal dekat dengan kota besar Kuala Lumpur ini. Orang-orang ini menaruh was-was yang bertambah kuat bahawa UMNO atau orang-orang Melayu tidak akan mendapat apa-apa faedah daripada perpaduan UMNO – M.C.A. itu. Mereka juga insaf bahawa yang masih kuat menyokong perpaduan itu ialah ahli-ahli UMNO yang berharapkan kepentingan diri

mereka umpamanya kalau perpaduan itu kekal lama, M.C.A.mungkin akan memberi wang untuk membangunkan rumah UMNO di Kuala Lumpur itu. Pungutan daripada ahli-ahli UMNO sendiri – walaupun telah dijalankan dengan berbagai-bagai ikhtiar. Menjual gambar warna-warni rumah UMNO, mengadakan sandiwara dan sebagainya – tidak mendapat hasil yang memuaskan. Bangunan itu akan memakan belanja tak kurang daripada \$200,000.00 dan jikalau diharapkan semata-mata datangnya daripada ahli atau ikhtiar-ikhtiar UMNO maka jumlah itu barangkali akan tercapai dalam masa dua puluh tahun!

Rumah UMNO cadangan (atau yang “di-Mat Jenin-kan” itu) adalah satu rumah yang besar – enam tingkat – dan cukup moden. Tetapi bentuknya sama sekali tidak menunjukkan tanda-tanda kebudayaan Melayu – melainkan satu bangunan moden yang menyerupai rumah di Broadway dalam negeri Amerika.

Apakah yang diharapkan oleh ahli-ahli UMNO yang mementingkan faedah diri itu? Begini sahaja, kalau rumah itu sudah siap mereka harap boleh dapat bilik-bilik untuk tempat tinggal atau untuk guna perniagaan.

Letaknya rumah itu – seperti yang dicadangkan – ialah di tengah-tengah Batu Road. Memang bagus betul tempat itu untuk orang-orang Melayu yang berharap hendak mencari keuntungan dan kesenangan diri sendiri daripada politik – Lucky World dekat dari situ, Chow Kit Road pun dekat . . . !

Kebimbangan ahli-ahli UMNO yang tinggal dekat dengan kota Kuala Lumpur itu ternyata dengan langkah mereka memujuk A.Aziz Ishak masuk UMNO. Aziz sudah masuk, tetapi tak berapa bulan lagi Aziz akan berangkat ke England kerana menjaga cawangan pejabat Utusan Melayu di sana.

Baharu-baharu ini mereka mencuba pula hendak menarik A.Ishaq bin Haji Muhammad yang baharu keluar daripada

tahanan supaya masuk UMNO. Tetapi A.Ishaq tak mahu “mendukung biawak hidup”. Dia tak mahu memanjat ikut “punggur” yang telah lapuk. Mungkin juga beliau itu ada mempunyai sebab-sebab yang lain.

Dalam kenyataannya kepada *Utusan Zaman* (5.7.53) beliau mengatakan bahawa beliau belum mahu mencampuri politik kerana beliau sekarang sedang belajar membuat filem dan kerana pada pengetahuannya sebilangan besar daripada ahli-ahli mendiang PKMM tiada akan mengizinkan beliau masuk UMNO.

Sementara itu, dalam minggu awal bulan Julai ini perhatian orang Melayu tertarik pula kepada “silat dan samba” Sofī – Sa'don di Singapura. Sa'don sudah tak laku (bukan kerja peguamnya). Dia terbang pula ke Pulau Pinang. Tetapi, walau macam mana hebat sekali pun penerangan Sa'don kepada pemuda-pemuda Pulau Pinang dan kuat pula sokongan mereka kepada UMNO dan perjuangannya, tetapi kutipan derma kemerdekaan yang telah didapati di situ pada hari ini hanyalah sebanyak \$32.00. Ini hanyalah cukup untuk membeli 20 mangkuk laksa di Tip Top Restaurant di Pulau Tikus.

Ringkasnya UMNO – M.C.A., menurut tinjauan ahli-ahli politik yang tajam perhatiannya, akan menempuh jalan buntu, akibatnya nanti ialah Tengku Abdul Rahman akan jatuh. Demikian juga kawan-kawannya. Dalam bulan Ogos ini Persidangan Agung Tahunan UMNO akan diadakan di Alor Setar. Memilih Alor Setar sebagai tempat persidangan itu mungkin juga ada berkaitan dengan kebimbangan Tengku Abdul Rahman yang ia akan jatuh. Kalau di Alor Setar beliau harus boleh menimbulkan suasana yang sesuai untuk mendapat sokongan banyak kerana Alor Setar itu tempat beliau, kawan-kawan beliau banyak di sana dan kebolehan beliau untuk menyenangkan wakil-wakil UMNO dan melembutkan hati mereka tentulah lebih banyak daripada tempat-tempat yang lain.